



REPUBLIKA E KOSOVËS
REPUBLIKA KOSOVA – REPUBLIC OF KOSOVO
KËSHILLI GJYQËSOR I KOSOVËS
SUDSKI SAVET KOSOVA - KOSOVO JUDICIAL COUNCIL

Këshilli Gjyqësor i Kosovës,

Në mbështetje të nenit 7 pika 1.24 të Ligjit Nr. 06/L – 055 për Këshillin Gjyqësor të Kosovës, nenit 115 paragrafi 2 të Ligjit Nr. 08/L-228 për Zgjedhjet e Përgjithshme në Republikën e Kosovës, si dhe nenit 30 paragrafi 1 të Rregullores Nr. 03/2020 për Organizimin dhe Veprimtarinë e Këshillit Gjyqësor të Kosovës, në mbledhjen e mbajtur më datën x tetor 2023,

Miraton:

RREGULORE NR. X/2023

**PËR STATUSIN, KUSHTET DHE PROCEDURËN E EMËRIMIT TË
PANELIT ZGJEDHOR PËR ANKESA DHE PARASHTRESA**

Neni 1
Qëllimi

Kjo rregullore përcakton statusin, kushtet, procedurën e përzgjedhjes dhe emërimin e anëtarëve të Panelit Zgjedhor për Ankesa dhe Parashtresa.

Neni 2
Fushëveprimi

Kjo rregullore zbatohet ndaj Panelit Zgjedhor për Ankesa dhe Parashtresa.

Neni 3
Përkufizimet

1. Shprehjet e përdorura në këtë rregullore kanë kuptimin si në vijim:

- 1.1. **Këshilli** - Këshillin Gjyqësor të Kosovës, ashtu siç përcaktohet me Ligjin për Këshillin Gjyqësor të Kosovës;
- 1.2. **PZAP** – Panelin Zgjedhor për Ankesa dhe Parashtresa, ashtu siç përcaktohet me Ligjin për Zgjedhjet e Përgjithshme në Republikën e Kosovës;
- 1.3. **Kryesues i PZAP** - gjyqtarin e Gjykatës Supreme të emëruar nga Këshilli, i cili kryen detyrat dhe përgjegjësitë në pajtim me Ligjin për Zgjedhjet e Përgjithshme në Republikën e Kosovës;

- 1.4. **Anëtar i PZAP** – gjyqtarin e Gjykatës së Apelit të emëruar nga Këshilli, i cili kryen detyrat dhe përgjegjësitë në pajtim me Ligjin për Zgjedhjet e Përgjithshme në Republikën e Kosovës;
- 1.5. **Njësia** - Njësine për Inspektim Gjyqësor, ashtu siç përcaktohet me Ligjin për Këshillin Gjyqësor të Kosovës;
- 1.6. **Komisioni për shqyrtimin e aplikacionit** – Komision ad hoc i themeluar nga Këshilli i cili shqyrton, analizon dhe vlerëson aplikacionin dhe dokumentet e bashkangjitura të gjyqtarëve aplikant për anëtarë të PZAP;
- 1.7. **Komisioni për shqyrtimin e ankesave** – Komision ad hoc i themeluar nga Këshilli për shqyrtimin e ankesave ndaj vendimeve të Komisionit për shqyrtimin e aplikacionit;
- 1.8. **Anëtar i komisionit** - anëtarin e emëruar nga Këshilli, i cili kryen detyrat dhe përgjegjësitë në pajtim me këtë rregullore;
- 1.9. **Anëtar rezervë i komisionit** – anëtarin e emëruar nga Këshilli i cili zëvendëson anëtarët e komisionit në rast të konfliktit të interesit apo rastet e tjera të pengesave eventuale gjatë ushtrimit të detyrës si anëtar;
- 1.10. **Subjekte bartëse të procesit të emërimit** - anëtarët e Komisioni për shqyrtimin e aplikacionit, Komisioni për shqyrtimin e ankesave dhe zyrtarët e Njesisë dhe përdoret vetëm për qëllime të kësaj rregullore.

2. Shprehjet e përdorura në njëjës e kanë të njëjtin kuptim edhe në shumës. Fjalët e përdorura në një gjini përfshijnë edhe gjininë tjetër.

Neni 4 Parimet

1. PZAP, ushtron detyrat dhe aktivitetet në bazë të parimeve si në vijim:

- 1.1. **Parimi i Ligjshmërisë** – PZAP ushtrimin e aktiviteteve dhe detyrave të punës e bën në bazë të Kushtetutës, ligjeve dhe akteve tjera nënligjore.
- 1.2. **Parimi i profesionalizmit** - PZAP ushtron detyra dhe përgjegjësi profesionale në përputhje me legjislacionin në fuqi. Anëtarët e PZAP përkushtohen ndaj zhvillimit të njohurive dhe praktikave të reja profesionale dhe ofrojnë shërbime cilësore.
- 1.3. **Parimi i pavarësisë dhe paanshmërisë** - PZAP ushtron detyrat dhe përgjegjësitë në mënyrë të pavarur dhe të paanshme në pajtim me legjislacionin në fuqi.
- 1.4. **Parimi i transparencës dhe llogaridhënies** - PZAP është organ transparent dhe llogaridhënës për punën dhe veprimet e tij, duke siguruar qasje në informacione relevante për të gjithë personat e interesuar në përputhje me legjislacionin në fuqi.
- 1.5. **Parimi i përfaqësimit gjinor** – Këshilli siguron që në përbërjen e PZAP të ketë përfaqësim të drejtë gjinor në përputhje me Kushtetutën dhe legjislacionin në fuqi.

- 1.6. **Parimi i ruajtjes së fshehtësisë zyrtare** - PZAP ruan konfidencialitetin e informacionit, që ka në zotërim, por pa cenuar zbatimin e detyrimeve që dalin nga legjislacioni që ka të bëjë me qasjen në dokumente publike.

Neni 5

Statusi i Panelit Zgjedhor për Ankesa dhe Parashpresa

PZAP është organ i përhershëm dhe i pavarur, kompetent për të vendosur në lidhje me parashpresat dhe ankesat e lejuara që kanë të bëjnë me procesin zgjedhor sipas legjislacionit në fuqi.

Neni 6

Përgjegjësi nga përgjegjësia penale dhe civile e anëtarëve të PZAP

1. Anëtarët e PZAP nuk mbajnë përgjegjësi penale apo civile për vendimet, mendimet e shprehura dhe veprimet e marra brenda fushës së përgjegjësisë si anëtarë të PZAP.
2. Këshilli njoftohet pa vonesë kur ngritët aktakuzë apo arrestohet ndonjë nga anëtarët e PZAP.

Neni 7

Kushtet dhe përvoja specifike për emërimin e anëtarëve të PZAP

1. Gjyqtari i cili aplikon për anëtarë të PZAP duhet të plotësojë kushtet si në vijim:
 - 1.1. të jetë gjyqtarë nga radhët e Gjykatës Supreme për kryesues të PZAP, ndërsa për anëtarë të PZAP të jetë gjyqtarë nga radhët e Gjykatës së Apelit;
 - 1.2. të mos ketë të shqiptuar masë disiplinore, përjashtimisht masës vërejtje jo publike me shkrim;
 - 1.3. të ketë vlerësimin e performancës për tre (3) vitet e fundit shkëlqyeshëm apo shumë mirë.

Neni 8

Shpallja e pozitës së lirë për anëtar të PZAP

1. Në rast se pozita e kryesuesit apo një anëtar mbetet e zbrazët për shkaqe të parapara me legjislacionin në fuqi dhe këtë rregullorë, Këshilli brenda tridhjetë (30) ditëve do të zëvendësojë anëtarin. Këshilli me vendim, shpall konkurs për vendin e lirë për anëtarë të PZAP, i cili publikohet në faqen zyrtare të Këshillit dhe PZAP.
2. Këshilli njoftohet nga drejtori i Sekretariatit të PZAP, tridhjetë (30) ditë para përfundimit të mandatit të anëtarit të PZAP, ndërsa në rastet tjera Këshilli informohet menjëherë.
3. Shpallja e vendit të lirë përmban të gjitha informatat përkatëse për çdo pozitë, duke përfshirë:
 - 3.1. numrin e pozitës së lirë;
 - 3.2. kriteret rreth kualifikimit;
 - 3.3. mënyrën e dorëzimit të aplikacionit;

- 3.4. afatin e fundit për dorëzimin e aplikacionit, që nuk mund të jetë më i shkurtër se tetë (8) ditë; si dhe
- 3.5. udhëzimi për pasojat që bartë kandidati në rast të mos dorëzimit të aplikacionit dhe dokumenteve mbështetëse, brenda afatit të paraparë me konkurs.

4. Para shpalljes së pozitave të lira në PZAP, Këshilli bënë vlerësimin e përbërjes aktuale të PZAP në pikëpamje të përfaqësimit gjinor dhe komunitetit jo shumicë. Nëse Këshilli gjen se ka nën përfaqësim gjinor dhe të komunitetit jo shumicë në përbërjen e anëtarëve të PZAP, atëherë shpallja për pozitë të lirë bëhet për kandidatët gjyqtarë nga gjinia, përkatësisht komuniteti jo shumicë i nën përfaqësuar.

Neni 9

Mënyra e aplikimit

Kandidati duhet të dorëzojë aplikacionin e plotësuar në mënyrë të rregullt, fizike apo në mënyrë elektronike.

Neni 10

Komisioni për shqyrtimin e aplikacionit

1. Këshilli, për çdo konkurs të hapur themelon Komisionin për shqyrtimin e aplikacionit në bazë të kriterëve të aplikueshme sipas legjislacionit në fuqi dhe akteve normative të miratuara në Këshill.
2. Komisioni për shqyrtimin e aplikacionit të kandidatit për kryesues/anëtar të PZAP themelohet nga Këshilli, i cili përbëhet nga tre (3) anëtarë, dy prej tyre duhet të jenë anëtar të Këshillit dhe një (1) anëtarë të jetë nga radhët e gjyqtarëve të Gjykatës Supreme, si dhe dy (2) anëtarë rezervë, prej të cilëve njëri vjen nga anëtarët e Këshillit, kurse tjetri nga radhët e gjyqtarëve të Gjykatës Supreme.
3. Këshilli zgjedh kryetarin e komisionit nga radhët e anëtarëve të rregullt të Komisionit për shqyrtimin e aplikacionit.
4. Gjatë vendosjes për përbërjen e Komisionit për shqyrtimin e aplikacionit, Këshilli merr parasysh parimin e barazisë gjinore dhe përfaqësimin e komuniteteve jo - shumicë.
5. Komisioni për shqyrtimin e aplikacionit është përgjegjës që në afat jo më larg se pesë (5) ditë të bëjë shqyrtimin e aplikacionit të kandidatit për kryesues/anëtar të PZAP.
6. Komisioni për shqyrtimin e aplikacionit harton raport lidhur me kandidatët të cilët i plotësojnë kushtet formale për emërimin e anëtarëve të PZAP i cili raport iu dorëzohet të gjithë gjyqtarëve të cilët përmes konkursit të hapur kanë aplikuar për të qenë pjesë e PZAP.
7. Komisioni për shqyrtimin e aplikacionit të kandidatit për kryesues/anëtar të PZAP mbështetet nga stafi i Njësisë.

Neni 11

Komisioni për shqyrtimin e ankesave

1. Këshilli, për çdo konkurs të hapur themelon Komisionin për shqyrtimin e ankesave në bazë të kriterëve të aplikueshme sipas legjislacionit në fuqi dhe akteve normative të miratuara në Këshill.
2. Komisioni themelohet në përbërje prej tre (3) anëtarëve të rregullt, prej të cilëve dy nga radhët e gjyqtarëve të Gjykatës Supreme dhe një (1) anëtarë nga Këshilli, si dhe dy (2) anëtarë rezervë, prej të cilëve njëri vjen nga anëtarët e Këshillit, kurse tjetri nga radhët e gjyqtarëve të Gjykatës Supreme.
3. Këshilli zgjedh kryetarin e komisionit nga radhët e anëtarëve të rregullt të Komisionit për shqyrtimin e ankesave.
4. Gjatë vendosjes për përbërjen e Komisionit për shqyrtimin e ankesave, Këshilli merr parasysh parimin e barazisë gjinore dhe përfaqësimin e komuniteteve jo - shumicë.
5. Komisioni është përgjegjës për shqyrtimin e ankesave të kandidatit për kryesues/anëtar të PZAP, të paraqitura ndaj vendimeve të Komisionit për shqyrtimin e aplikacioneve të kandidatit.

Neni 12

Konflikti i Interesit

1. Konflikt interesi paraqet çdo rrethanë e cila për subjektet bartëse të procesit të emërimit të kryesuesit/anëtarit të PZAP, do të konsiderohej si interes privat që ndikon, mund të ndikojë ose duket se do të ndikon në kryerjen me paanshmëri dhe objektivitet të detyrës së tyre, ashtu siç përcaktohet me Ligjin për Parandalimin e Konfliktit të Interesit në Ushtrimin e Funkcionit Publik.
2. Subjektet bartëse të procesit të emërimit të kryesuesit/anëtarit të PZAP duhet të bëjnë përpjekje ta parandalojnë dhe/ose t'i shmangen çfarëdo situatë të konfliktit të interesit gjatë ushtrimit të detyrave të tyre. Shfaqja e ndonjë konflikt interesi do të jetë po aq e dëmshme për respektin e publikut për punën e kryer nga Këshilli sikur edhe vet konflikti aktual i interesit.
3. Në rast se gjatë procesit të emërimit të kryesuesit/anëtarit të PZAP, ndonjë subjekt bartës i procesit të emërimit beson se mund të ketë konflikt interesi, ai/ajo duhet ta njoftoj menjëherë me shkrim për këtë çështje kryetarin e Komisionit përkatës, i cili pas verifikimit të konfliktit të mundshëm të interesit vendos për përjashtimin dhe zëvendësimin e tij/saj.
4. Në rast se konflikti i interesit lidhur me procesin e emërimit, paraqitet nga kryetarët e komisioneve përkatëse, të njëjtit me shkrim e njoftojnë Këshillin, i cili pas verifikimit të konfliktit të mundshëm të interesit vendos për përjashtimin dhe zëvendësimin e tij/saj.
5. Subjektet bartëse të procesit të emërimit, me rastin e paraqitjes së konfliktit të mundshëm të interesit detyrohen që menjëherë të pezullojnë çfarëdo veprimi të mëtejshëm, deri sa të vendoset lidhur me përjashtimin dhe zëvendësimin e tij/saj, sipas përcaktimit të bërë me paragrafin 3 dhe 4 të këtij neni.

6. Në rast se subjektet bartëse të procesit të emërimit sipas këtij neni gjenden në një situatë të konfliktit të interesit me ndonjë kandidat dhe një fakt të tillë e kanë mbajtur të fshehur, për subjektin bartës të procesit, tërheq përgjegjësi disiplinore.

Neni 13 **E drejta e ankesës**

1. Kandidati si palë e pakënaqur ka të drejtë ankesë në Komisionin për shqyrtimin e ankesave në Këshill, jo më vonë se tre (3) ditë pune pas pranimit të raportit nga ana e Komisionit për shqyrtimin e aplikacioneve, në rast se konsideron se i ka plotësuar kushtet formale të parapara me nenin 7 të kësaj rregullore për emërim si anëtar i PZAP.

2. Komisioni për shqyrtimin e ankesave brenda pesë (5) ditëve nga dita e përfundimit të afatit për ankesë shqyrton të njëjtën dhe nëse gjen se ankesa është e bazuar merr vendim që Komisioni për shqyrtimin e aplikacionit brenda pesë (5) ditëve, të shqyrtojë pjesën e vlerësimit ankimor. Vendimi i komisionit për shqyrtimin e ankesave duhet të jetë i arsyetuar.

Neni 14 **Raporti final i komisionit për shqyrtimin e aplikacionit**

1. Pas përmbylljes së procedurës ankimore, Komisioni për shqyrtimin e aplikacionit përpilon raportin final të kandidatëve të suksesshëm siç përcaktohet me këtë rregullore, të cilin e dërgon në Këshill për qëllim të emërimit të kandidatit.

2. Në rast se Komisioni për shqyrtimin e aplikacionit ka konstatuar se nuk ka kandidat të cilët nuk i plotësojnë kushtet formale të përcaktuara në këtë rregullore, i njëjti i propozon Këshillit që të ri-shpallë konkurs të ri për pozitën përkatëse.

Neni 15 **Procedura e votimit**

1. Pas pranimit të listës me kandidatin/kandidatët për të cilët nga Komisioni për shqyrtimin e aplikacionit është konstatuar se i plotësojnë kushtet formale për të qenë anëtar i PZAP, Këshilli vendos për emërim të kryesuesit/anëtarëve të PZAP.

2. Këshilli, voton në mënyrë të fshehtë kandidatin/kandidatët që kanë plotësuar kushtet formale për të qenë anëtar i PZAP nga Komisioni për shqyrtimin e aplikacionit. Kandidati i cili merr shumicën e thjeshtë të votave të anëtarëve të pranishëm konsiderohet si i emëruar për pozitën e kryesuesit/anëtarit të PZAP.

3. Këshilli, voton në mënyrë të fshehtë kandidatin/kandidatët që kanë plotësuar kushtet për të qenë anëtar i PZAP nga Komisioni për shqyrtimin e aplikacionit. Kandidatët do të votohen nga Këshilli në të njëjtën kohë dhe me përdorimin e një fletëvotimi të vetëm që përmban emrat e të gjithë kandidatëve, si në vijim:

3.1. kandidati që merr shumicën e votave nga votat e përgjithshme, të dhëna nga anëtarët e pranishëm të Këshillit do të konsiderohet i emëruar;

- 3.2. anëtari i Këshillit mund të abstenojë nga votimi para fillimit të procesit të votimit, asnjë anëtar nuk do t'i lejohet të abstenojë pas fillimit të procesit të votimit për kandidatët;
- 3.3. nëse në raundin e parë të votimit asnjëri prej kandidatëve nuk arrin të marrë shumicën e votave, do të zhvillohet një raund i dytë me dy kandidatët të cilët kanë marrë numrin më të madh të votave në raundin e parë. Nëse dy ose më shumë kandidatë renditen të dytë për shkak të marrjes së numrit të barabartë të votave në raundin e parë të votimit, të gjithë do të marrin pjesë në raundin e dytë të votimit;
- 3.4. nëse në raundin e dytë të votimit asnjëri nga kandidatët nuk merr shumicën e thjeshtë të votave, do të bëhet një raund i tretë i votimit me dy kandidatët të cilët kanë marrë numrin më të lartë të votave në raundin e dytë të votimit.

4. Nëse në raundin e tretë asnjëri nga kandidatët nuk merr shumicën e thjeshtë të votave, konkursi do të ri - shpallet nga Këshilli.

Neni 16 **Procedura e emërimit**

1. Pas votimit, Këshilli brenda njëzet e katër (24) orëve me vendim emëron kryesuesin dhe anëtarët e PZAP.
2. Vendimi i Këshillit për emërim të kryesuesit/anëtarëve të PZAP duhet të jetë i arsyetuar.

Neni 17 **Suspendimi dhe shkarkimi i kryesuesit dhe anëtarëve të PZAP**

1. Kryesuesi dhe anëtarët e PZAP suspendohen nga pozita e tyre në PZAP automatikisht, nëse të njëjtit nga Këshilli janë suspenduar për shkelje që lidhen me pozitën e gjyqtarit në gjykatën në të cilën shërben.
2. Nëse, Këshilli e anulon vendimin për suspendim për shkeljen që lidhen me pozitën e gjyqtarit, kryesuesi dhe anëtarët e PZAP-së kthehen përsëri në pozitën e tyre si kryesues/anëtar i PZAP, nëse vendimi i nxjerrë është brenda mandatit të tyre.
3. Kryesuesi dhe anëtarët e PZAP mund të shkarkohen në këto raste:
 - 3.1. humbjen e zotësisë për veprim për më shumë se tre (3) muaj për shkaqe mjekësore të vërtetuara;
 - 3.2. dështimin e vazhduar për të marrë pjesë në veprimtaritë e PZAP për më gjatë se tre (3) muaj;
 - 3.3. në rast të shqiptimit të masës disiplinore të transferimit të përhershëm në një gjykatë të nivelit më të ulët.

Neni 18

Procedura për shkarkim

1. Inicimi i procedurës për shkarkim të anëtarit të PZAP bëhet në Këshill, përmes kërkesës që e parashtron kryesuesi i PZAP. Ndërsa për kryesuesin inicimi i procedurës për shkarkim bëhet zyrtarisht nga Këshilli.
2. Kërkesa për iniciimin e procedurës duhet të përfshijë të dhënat e anëtarit dhe arsyet për shkarkim sipas nenit 17 paragrafit 3 të kësaj rregullore.
3. Këshilli me rastin e pranimit të kërkesës autorizon drejtorin e Sekretariatit të PZAP për mbledhjen e të dhënave të nevojshme që mund të shërbejnë për marrjen e vendimit, i kërkon sqarime anëtarit të PZAP që t'i deponoj me shkrim. Pas vlerësimit të të gjitha rrethanave Këshilli merr vendim të arsyetuar për shkarkimin e anëtarit të PZAP.

Neni 19

Përfundimi i mandatit

1. Mandati i anëtarit të PZAP përfundon me:
 - 1.1. vdekje;
 - 1.2. pushimin e statusit të gjyqtarit;
 - 1.3. skadimin e mandatit;
 - 1.4. dorëheqje, duke i ofruar Këshillit njoftim paraprak prej tridhjetë (30) ditësh;
 - 1.5. arritjen e moshës së pensionimit;
 - 1.6. është dënuar për vepër penale me përjashtim të veprave penale të kryera nga pakujdesia;
 - 1.7. në rast të ngritjes në detyrë në një gjykatë të nivelit më të lartë.

Neni 20

Dispozitat shfuqizuese

Me hyrjen në fuqi të kësaj rregullore shfuqizohet të gjitha dispozitat e akteve nënligjore që bien në kundërshtim me këtë rregullore.

Neni 21

Hyrja në fuqi

Kjo rregullore hyn në fuqi ditën e miratimit nga Këshilli Gjyqësor i Kosovës.

Albert Zogaj,

Kryesues i Këshillit Gjyqësor të Kosovës

Datë: ____ . ____ . ____